

皇明詞林人物考

皇明詞林人物考卷之三

楚麻城王兆雲元慎輯著

豫順陽李 蔭褶煥閱訂

商文毅

公名輅字弘載淳安人正統十年進士鄉會廷
試皆第一爲翰林修撰十四年景帝監國入內
閣陞侍讀明年八月 上皇還京陞學士三年
兵部左侍郎兼春坊學士太常少卿景帝不豫
大監興安問公云何公曰今 上乃 章皇帝

子當復立 章皇帝孫它非所當立疏未進石
亨輩迎 上皇復位亨素忌公中坐歿奏上內
批除名公去久不得召成化二年召復入內閣
首疏八事勤政納諫儲將材飾邊備革冗員設
社倉崇先聖之號以配天開入德之基以造士
四年議 慈懿皇太后喪禮得祔葬祔廟是年
彗星見言官劾公力求退不允陞兵部尚書兼
學士八年上弭災七事崇正道謹命令親賢臣
慎賞罰納諫諍勵官守恤軍民十年改戶部

書十一年兼文淵大學士 上名見語及監國
事公言景泰有社稷功當復帝號公因請立
皇子東宮先是悼恭太子薨 上憂念已知西
宮有子育於貴妃皇子之母因病別居久不得
見公請令就近居住皇子仍煩貴妃撫育朝夕
接見庶遂母子之情愜朝野之論遂命擬皇子
名皇子母薨得贈淑妃立東宮加太子少保吏
部尚書十三年建玉皇閣上䟽請停造進謹身
大學士會黑青見條上八事曰惜符券禁玩好

求直言理冤抑停管繕實邊儲守關隘增雲南
巡撫汪直開西廠羅織數起大獄公疏言伺察
大急并條汪直十罪 上立命去西廠內臣忌
公會楊燁董璵事誣公不安請老陞少保致仕
居家十年卒年七十二贈太傅謚文毅所著集
若干卷行於世

郭定襄

公名登字元登直隸臨淮人營國威襄公英之
孫也正統七年征麓川靖遠伯王驥薦登爲副
分兵鎮臨安檄召諸夷長宣布 朝廷威德諸
夷長帖服爭獻珍貝不受十四年七月也先入
寇 天子親征至萬全西寧侯宋英武進伯朱
冕相繼覆沒乃拜登都督僉事副廣寧伯劉安
鎮大同尋 詔班師登語學士曹鼎張益曰
駕還宜從紫荊關鼎等入奏已得請從紫荊矣

俄折而東竟從居庸未入而 天子蒙塵大同
城門晝閉軍士多戰死所存皆創殘登涕泣循
之弔歔問傷親爲裹瘡傳以藥或謂登曰事已
至此城旦夕且破何空自苦乎登曰吾誓以此
城存亡當不使諸君獨歔也八月也先奉 上
皇至城下索金幣萬計約賂至卽歸駕登閉門
不納 上皇傳旨曰朕與登有姻婣何外朕若
此登傳奏曰臣奉命守城不敢善啓閉竟不出
校尉袁彬以頭觸門大呼劉安及給事中孫祥

知府霍瑄乃出見納賂而也先實無歸駕意也
登曰此給我耳及擁上皇去登大慟時賊勢
張甚獨登守城十月虜寇京師登率所部并糾
集忠義從鴈門入援十二月虜又將復犯京師
登奏言京軍新選不可輕戰宜分營犄角以逸
待勞以主待客勿求僥倖務出萬全虜自屢勝
以來出入自由不聞有出一兵拒之者登不勝
憤晝夜以忠義激厲其軍定爲賞格期必殺賊
謀報東驛賊入竟登率兵躡之行七十里至水

頭日暮休兵夜二鼓諜報二十里外沙窩有賊
營十二登名將士問計皆曰賊衆我寡莫若全
軍而還登曰我軍已去城百里且疲困一退避
賊以鐵騎來追雖欲自全得乎卽按劍起曰敢
言退者斬進薄賊營昧旦賊以數百騎迎戰登
奮勇先登諸軍繼進呼聲震山谷登射殺二人
手刃一人賊大敗追奔四十餘里至栲栳山共
斬首捕虜二百餘騎奪回人口牛馬弓械以萬
計捷聞封定襄伯登廉潔尚謀與賊大小數十

戰未嘗挫衄善撫士卒有古良將風 英廟復
辟命掌南京中軍都督府事尋謫戍甘肅 憲
廟嗣統復爵鎮守甘肅以薦召還總神機營掌
中府事尋命提督十二國管多所建明登工詩
所著有連珠集謫甘州時有詩送丘正曰青海
四年羈旅客白頭雙淚倚門親莫道得歸心便
了天涯多少未歸人又曰甘州城南河水流甘
州城北胡雲愁玉關人老貂裘敝苦憶平生馬
少游大學士李東陽評其詩爲 國朝武臣之

冠卒贈定襄侯

岳文肅

公名正字季方進士及第授編脩景泰三年遷左贊善兼編脩天順元年改兼脩撰王忠肅公薦公宰相材名對文華殿公神采秀發上遙見遂曰好公登殿又曰好好問年幾何對曰四十又曰正好問家安在對曰鄆縣曰又朕北方人甚善問讀何經對曰尚書曰是書經尤善問舉進士科對曰正統十三年上益喜曰朕固取汝朕今用汝內閣許彬老矣不足恃汝爲朕

努力公頓首受命出赴閣至左順門遇石亨張
軌愕然問曰何爲至此公不對二人者忌公才
名比見上上又言朕今擇一內閣臣甚佳二
人者請爲誰上曰岳正顧正官小須與吏部
左侍郎兼翰林學士二人者陽頓首賀陛下
旣得人俟果稱職進官未晚上默然然時時
召見公公感知遇銳意功名欽天監湯序奏災
異請盡去奸臣上問公對曰奸臣無主名卽
求之人人自危且序術疎淺不足信事遂止

與豎吉祥表裏擅權有匿名投書指斥時事

狀吉祥獨不及亨吉祥怒力請上檢購告捕

者官三品公與呂文懿公見上曰爲政有體

朝廷豈可自榜購募秦始皇杜諫下妖言誹謗

令竟不聞其過以亡國乞以秦爲戒事遂止公

又言曹石驕橫不早制恐禍起肘腋上諭公

汝往告朕意公徑造亨所諷令戢斂二人者謂

公訐我短顧以上意劫我益大恨是年承天

門災下詔罪已公歷數政弊詞極切直二人者

造飛語岳正草詔出時時對人言此非 上意

我欲諷 上改過也正賣直訕君父不數日內

批降公欽州同知欽並南海瘴毒公便過家辭

母畱數日兵部尚書陳汝言者黨二人又憾公

嘗言其不可用者嗾邏者中公私事逮詔獄考

掠謫戍肅州鎮夷所未及行季鐸都督竟奪公

廬時猛虎石者太監鎮河西 上密諭石正須

生不須死四年石坐法誅明年曹又反誅 上

思公言解士五放歸田 茂陵卽位言官請復

公官吏部擬調南京 上曰勿調畱院充經筵
講官預脩 先朝實錄未幾南陽欲薦公南陽
子祭酒公不應忌者僞爲公劾南陽章示南陽
遂大疑公成化元年廷推公及禮科都給事中
張寧爲兵部清黃官不得陞興化知府公至興
化勤力民事操利權興脩水利積穀出羨餘補
助民役興化士人規利弗遂者騰謗書彭惠安
公獨曰太守節財愛民無他也三年至朝乞致
仕時季鐸敗朝廷還公故廬未幾卒公文章氣

節名滿海內抱負經濟屹屹不肯下人再起再
廢竟不盡其用嘉靖中贈太常卿諡文肅公自
贊有自京師來者傳天語於其曰岳正倒好只
是大膽或以賀正曰上念公如此行名公矣
曹生爲寫陋容遂櫟括其辭題於上曰岳正倒
好只是大膽惟帝念哉必當有感如或赦汝再
敢不敢臣常誦古人之言蓋將之死而靡憾也
公偉貌美髯言論灑灑動循矩度石曾事或議
其迂又曰未信而諫直應曰渠謂我諛官耶我

道當如是人有不可意事雖權貴人當言卽言
無藏宿以故竒公者雖多忌公者亦衆所著有
類博稿鳳洲筆記云公不以詩名家微吐一二
頗有風旨

王襄敏

公名越字世昌濬人景泰二年進士初爲御史
有名天順四年超陞山東按察使七年陞右副
都御史巡撫大同成化元年請告還京去居家
三年召署院事六年禦虜延綏有功轉左又以
黃草梁功陞右副都御史八年以寧夏功轉左
明年出延綏搜套搗虜巢斬首二百八十加太
子少保還掌院事十三年加太子太保兵部尚
書兼憲職十六年出大同禦虜時汪直薦公遂

言木ノ外ニ
統兵而西未至榆林虜大掠出塞公曰受命討
虜無俘獲何以輒班師遂潛師出塞至威寧海
與虜戰斬首四百封威寧伯與世券仍以左都
御史掌院事十七年出寧夏尋佩征西前將軍
印充總兵鎮大同移鎮延綏斬虜首功加太子
太傅掌前軍督府事明年言官劾公上奪公
封編管安陸弘治元年許還鄉七年陳寃下廷
議公功過復左都御史致仕十年虜大入塞陝
西急起總制寧夏甘涼諸路軍務並經畧哈密

召至陞見加太子太保公有才略著威望再起
亦奮厲出塞襲斬賀蘭巢虜奪還掠我人畜加
少保兼太子太傅十一年卒贈太傅諡襄敏所
著有王太傅集

何文肅

公名喬新字廷秀江西廣昌人吏部尚書文淵之第三子也少穎異景泰庚午中江西鄉試甲戌舉進士丙子授南京禮部主客司主事丁父憂歸服闋改刑部陝西司主事武清農婦牧牛于野二戎卒驅其牛去錦衣衛捕盜者坐以強盜喬新曰此白晝奪人物耳律當徒盜有分所劫綵繒遺逆旅主人巡徼者并執之以爲同盜喬新曰此分賊耳當與強盜殊科司寇陸瑜喜

曰子慎刑若此不愧廼翁矣廣東分司轄錦衣衛官校卒暴橫司官多優假之否則捃撫報復喬新曰法者天下之公有犯輒坐以法不少貸喉刺事者捃撫無所得由是官校相戒不敢犯陞福建按察副使時浙寇盜採壽寧諸縣銀礦募鄉兵擊擒之遂奏減礦課之半福寧土豪尤氏殺人拒捕以計擒其父子悉寘之法福清薛氏歲通番事覺欲爲亂捕而誅之清流之歸化里地介將樂沙縣之間其民恃險不出徭賦奏

立歸化縣擢河南按察使鉤州人趙甲飲陳乙酒肆夜歸溺于河甲之子訟乙毆死誣服喬新曰肆櫛比民居毆必有聞去河遠負尸投之必有見者驗甲尸腦有沙石乙得辨出陞湖廣右布政使荆襄大水漂溺千餘家躬爲拊循發粟給錢葺其居成化辛丑陞都察院右副都御史巡撫山西兼督兵三關北虜入寇設伏灰溝橋斬獲甚衆小王子寇大同圻輔震驚喬新以刑部侍郎奉勅巡邊經略戰守爲必搗老營之

計虜遁走山西大飢人相食承命往賑請發內帑并淮塩銀數萬兩勸貨富室得粟數十萬石所活三萬人招回復業者十四萬人附籍者六萬餘戶 孝廟卽位進南京刑部尚書大學士劉吉惡其剛直嗾御史鄒魯以事誣喬新遂乞致仕弘治壬戌卒于家喬新鯁介寡與筮仕卽自誓不營私不阿權不以愛憎爲賞罰終其身不食言進士時奉使淮西集令閭徼以嘗師文淵寄贈白金文綺卻之徼曰吾以壽吾師非贈

君也喬新曰予以壽吾父因他人致之則可因
吾致之則不可卒不受在閩市舶內臣死鎮守
太監分其遺貲遺三司獨力辭不獲輸于公帑
及陞長沛臬都指揮武成德喬新嘗薦之贈以
犀帶銀器喬新笑曰我知君君不知我耶成慚
而退致仕月楊愛遣使致金銀爲壽并獻文梓
一無所納或言似可受喬新曰戒之在得正在
今日博學好古所著有周禮註解左傳擷英宋
元史臆見叔丘集平生友彭韶文學友丘濬贈

太子少傅諡文肅

丘文莊

公名濬字仲深瓊山人景泰五年進士改庶吉
士授編脩少天資過人孤貧力學爲庶吉士益
務博覽群書爲文惟平易順暢成化元年爲侍
讀脩 英宗實錄兩廣用兵公上南陽平寇方
畧竒公言陞侍講學士內艱服闋還職五年陞
翰林學士十三年爲國子祭酒十六年進禮部
右侍郎掌監事嚴立師道綜理詳密 泰陵卽
位上大學衍義補 上喜陞尚書禮部掌詹事

時年七十矣弘治四年 憲宗實錄成加太子

太保兼文淵閣大學士入內閣上時政畧云灾

異屢見變不虛生天人相與甚可畏也臣願體

上天仁愛念祖宗基業端身以立本清心以應

務謹好尚勿流于異端節財費勿至于耗國公

任用勿失於偏聽禁私謁以肅內政明義理以

絕神奸慎儉德以懷永固勤政務以弘至治庶

可以回天灾消物異帝王之治可幾也七年陞

少保改尚書戶部大學士武英殿公每以寬大

啓 上心忠厚變士習平順正文體經濟覈人材更張立治體又請訪求遺書 上知公事上

輒允吏部考察外官斥二千餘人公言非祖宗制歷官未二載者且復任雖經一考非貪暴蹤跡顯著者且勿斥三原在吏部持正不肯徇人公不說誣訐三原以故臺諫又劾公公乞老未允卒贈太傅諡文莊公好論議上下千古尤熟國家典故政事可否反復與大臣言爭是非卽未必一中適然不肯妍媸取悅商確往事時出

意見自高奇矯衆論能以辨博濟其說所著有
瓊臺類稿世史正綱家禮儀節朱子學的等書
廖道南曰國初洪武建文間時則有若劉伯溫
之宏大宋景濂之浩博王子充之醇正方孝孺
之爾雅未樂宣德間時則有若解大紳之雄放
胡光大之豪宕楊文貞之精密正統間時則有
若李忠文之朴茂劉文安之該覈然比自麗藻豐
腴未有若丘文莊之明體適用酌古准今褒然
爲一代文宗也蓋文莊自 孝宗登極進大學

衍義補卽蒙眷注馴至入閣尤加信任言必聽
諫必行時政一疏以因循苟且爲戒以勵精圖
治爲法誠得人臣進規之義亦可謂行其所學
者矣且平生著述甚多非問學淵深何以臻此

李文正

公名東陽字賓之茶陵人戊籍居京師天順八年進士翰林庶吉士成化元年授編脩十年轉侍講十九年進侍讀學士明年充東宮講讀官憂去弘治二年遷左庶子兼侍講學士四年實錄成陞太掌少卿仍掌院事七年禮部侍郎八年兼文淵閣太學士入內閣時占城爲安南侵擾請賜詰問公曰春秋王者不治夷狄安南雖奉正朔然負固已久今遣官至其國徒操寸舌

言才人傳卷之三
小必飾非大或拒命若置而不問損威已多卽
問罪興師貽患尤大宜勿聽十年中官李廣以
燒煉齋醮被寵公與同官上疏乞遠邪佞斥誣
妄科道疏救武岡知州劉遜 上震怒俱下獄
又上疏申救得釋尋召至平臺奏事云十一年
加太子少保禮部尚書召見面議四營總兵官
去留是年清寧宮災公上弭災疏時有爲李廣
乞祠額者公執不可清寧宮成召僧慶讚公又
執不可 上皆從之十二年命公覆試會試生

十六年加太子太保戶部尚書謹身殿太學士
十七年祀闕里還上時政疏十八年上不豫
入受顧命 康陵卽位加少傅兼太子太傅正
德元年 上不親政上早朝崇儉疏又與同官
上疏曰 先帝顧命惓惓以 陛下爲記邇者
地動天鳴白虹貫日群災疊異併在一時未有
如此而不亂者且詔令廢格變易殆盡憂在民
生國計若罔聞知事涉于近幸貴戚牢不可破
或旨從中出畧不與聞或有所擬議徑行改易

若諉顧命之名不盡輔導之責天下後世其謂之何不報又陳政令十失冬加少師兼太子太師吏部尚書華蓋殿大學士二年逆瑾擅權益恣暴尚寶卿崔璿御史姚祥主事張偉皆誣執荷校長安門公力救得戍邊內苑御船獵獸上疏諫止三年給事張奎御史張或忤瑾荷校公疏救巡撫楊一清逮繫至公又力救是夏有投匿名文書疏瑾罪者瑾怒群臣悉治獄公又力救五年早上疏四事會張永發瑾奸伏誅論

加特進左柱國七年流賊數十萬殘破半天下
賊就平論功加廕公一子錦衣指揮辭上以
京軍不習戰陣欲更調邊軍公諫不聽乞休卒
年七十贈太師諡文正公慧悟夙成文章流麗
代言敷奏明暢爾雅又能獎進才雋推挽聲譽
風韻所漸人皆嚮附事 泰陵務忠勤 康陵
時保護善類清謹弗諭休休不專政歸鄉寺人
頗思之

倪文毅

倪公名岳字舜咨應天上元人也尚書文僖公
謙之子生而瓌岸秀異五歲聞鄰塾讀書聲卽
請游間侍文僖公問曰天上更有天地下亦當
有天蓋已自悟天包地之理矣登天順甲申進
士榜初在翰林進講其言剴切而音吐洪暢人
擬之范祖禹嘗議英憲廟祧禮德祖乃周
之后稷不可祧懿僖仁以次當祧太祖太
宗爲周之文武百世不遷奏上悉從之嘗言額

外設官甚爲民困又言減齋醮省供應罷營繕
上多從之累官吏部尚書卒 上甚優卹之

有文集若干卷

謝文肅

公名鐸字鳴治浙江太平人也天順甲申進士
選翰林庶吉士授編脩奉 旨校勘通鑑綱目
上疏言宋神宗喜通鑑理宗好綱目而不能推
之政治因勸求賢講學以史冊質經傳窮義理
則大本立而萬目自隨矣歷陞南京國子祭酒
禁諸生_班見禮捐皂役錢以分僚屬籍膳夫錢
于官構東西二書樓以皮鏤板上疏請增楊時
從祀而黜吳澄復疏擇師儒慎科貢廣載籍復

會饌均差遣尋改北雍請增號舍脩堂室以廟
門衢面多狹斜買地廓之買官廨三十餘區居
學宮以省僦直皆出夫皂顧役羨餘悉籍之于
公諸生貧困者有給死者請京府致賻給驛歸
其喪凡所建白皆師古義持獨見不徇俗希世
也所著有方石文集及赤城論諫錄赤城詩集
刻方遜志集以傳仕終禮部右侍郎卒贈尚書
諡文肅

章文懿

公名懋字德懋蘭谿人成化二年進士會試第一入翰林爲庶吉士逾年除編脩內庭張燈下詞臣賦詩公謂莊景黃仲昭曰此非盛世事也天子孝奉二宮惟在養志明月三人上章疏上怒杖闕下左遷知臨武縣稱三君子時羅一峰論南陽謫官又稱翰林四諫未行改南京大理評事轉福建按察僉事毅然以振風化爲已任善政卓然一考至吏部乞致仕閉門卻掃

疏弗入城廐二十餘年公卿累薦弘治十四年
召祭酒南監以父喪辭詔聽終制服闋上任謹
桀度尚德化厲庶耻諸生翕然向風上脩學政
陳時弊二疏正德元年陳治道要務五事曰勸
聖學隆繼述謹大婚重詔令敬天戒再疏乞休
未允任滿三載疏引年不待報歸復三疏得請
五年陞南太常卿辭六年陞南禮部侍郎辭致
仕嘉靖初進南禮部尚書致仕公少遊庠校讀
書問學負經濟志畧然不自衒露襟懷坦蕩不

脩城府器度宏偉不見涯涘望之麗朴卽之和
厚開心見誠好賢禮士與物無忤居常平易至
臨大事決大議則據經援古確乎不易且寡嗜
好謹出處筮仕九轉至八座居官不過十年歷
俸僅滿三考難進易退之節世尤高之至論宗
法如鄭義門兄弟篤義安得不久論風俗須仿
橫渠復古之志行藍田呂氏鄉約庶可一變而
厚論國政必先格君心收人才固民心爲本他
若論窮理于精義處得力居敬于專一上見功

言木ノ外ニ
皆發程朱所未發卒年八十六贈太子太保諡
文懿

程克勤

公名敏政字克勤成化二年進士敏政幼靈異少時讀書一目數行下以奇童薦入翰林入仕益攻學問淹貫經籍成化弘治間翰林稱敏政學最博膽李東陽文章俊麗陳音性行真純敏政爲宮坊侍講 康陵東宮弘治十年起復副總裁脩會典辭不至明年召至京以太常卿進禮部侍郎兼翰林學士侍東宮又明年主考禮部忌敏政者謗敏政洩會試題鬻進士得金錢

無算言官輒劾上逮治午門前敏政素負時名不能忍辱下人朋輩要津人亦幸敏政敗污讎去不可起復不復相左右敏政竟奪職逾年憂慙卒敏政讀書著述尚本實議論傳經義祭法理敏政少詹事時請正文廟祀典謂戴聖劉向賈逵馬融何休王肅王弼杜預八人宜褫爵罷祀鄭衆盧植鄭玄服虔范甯五人各祀于鄉后蒼說禮萬言號曲臺禮戴聖等皆受業今禮記非后氏不傳王通胡瑗身立師道百世如新

加封爵從祀乞別祠祀啓聖王以顏無繇曾點
孔鯉孟孫氏配享程珦朱松從祀疏下禮部報
聞又請錄開國功臣後裔又請楊時從祀文廟
請 孝穆太后比周姜嫄別廟享所輯有道一
編心經附註新安文獻志皇明文衡瀛賢奏對
錄宋逸民錄等書

莊孔暘

公名杲字孔暘直隸江浦人也成化丙戌進士
選庶吉士授翰林院檢討與江西羅倫及南海
陳獻章相友善尋同編脩章懋黃仲昭上培養
君德疏諫止上元放鰲山燈忤旨調湖廣桂
陽州判未行給事中毛弘御史陳壯論救改南
京行人司左司副遭艱服闋不起巡撫都御史
王恕欲以白金十五鎰治其廬不受弘治甲寅
以薦赴部入謁三揖不跪太宰耿裕起揖延以

茶令四司送出部門復除行人司副陞南京吏
部驗封司郎中丙辰以病告歸丁巳尚書倪岳
考泉老疾免官而泉已在告踰歲矣所著有定
山集

張汝弼

公名弼字汝弼號東海華亭人登成化羅倫榜進士以言事忤宰相去尋拜兵部主事轉員外郎陞南安府知府府當兩廣要衝大山長谷亡命嘯聚爲民患者日衆公下車悉捕滅之尋慮民勞役弗息亟請當道俾均節之且脩橋梁道路又毀淫祠百數十區爲社學表先賢跡若張九齡李剛劉元城諸公皆特祠至周程三先生旣祠而又立吟風弄月臺以致景仰其振教化

風俗類如此後謝病歸民立生祠祀焉歸三年卒壽六十三公資稟靈異充以學問老且不倦詩文成一家言公草書之妙冠冕一代所著有鶴城天趣清和慶雲東海諸藁若干卷謝鐸曰世謂文人類多浮薄君獨惇尚行履慨然以風節自持雖議論間雜訥諛而往往必以理勝故彭鳳儀嘗稱其天分人品問學政事而君亦嘗謂予戲評其所能曰人故以書名我公論哉君自視文爲最詩次之書又次之噫昔人稱五經

爲書畫所掩世莫克盡知其文章與經濟然則
君之所以自道者其亦感于斯乎

吳文定

公名寬字原博蘇之長洲人也累舉不第貢入太學上海張汝弼見而奇之曰天下亦有貢士若此者乎武功伯徐有貞慎許可獨折節與交曰此館閣器也成化壬辰中會試第一人廷試復第一寬素工古文辭及官翰林所著作輒傳播中外每東朝進講至理亂興亡未嘗不反覆言之也 孝皇之在東宮寬上疏曰竊惟東宮講學自寒暑風雨朔望令節外一歲中不過

數月一日中不過數刻古者八歲出就外傳居
宿于外誠欲離近習親正人也庶人且然况有
天下者乎弘治末孝肅太皇太后崩詔議祔
廟之禮寬時掌詹事府事上疏言魯頌姜嫄閔
宮春秋考仲子之宮皆爲別廟之證漢唐亦然
至宋乃有並祔者其禮已謬然皆諸弟繼室生
而爲配者非後子孫追尊之比惟李宸妃之歿
仁宗痛傷出于至情乃追尊祔祭此豈後世所
當法哉詔立廟別祭如寬言寬好古力學於權

勢治如也篤厚倫誼未第時嘗讓貢於其友同年賀解元恩邁疾京師遷歸其家朝夕視之賀死爲服一月喪旣官尚書歸至里第必步行未嘗乘輿成化弘治間以文章德行負天下之望者三十年受知孝皇寬居憂嘗虛少宰以待然竟以持正不得柄用天下惜之官至禮部尚書卒贈太子太保諡文定所著有吳匏菴集

王文恪

公名鏊字濟之吳人也少游京師吏部侍郎葉
盛試所學奇之時吏部尚書王翱新逝盛曰失
一王翱得一王鏊安知非後來忠肅乎乃親具
儀幣遣從編脩陳音游成化甲午薦應天第一
明年試禮部復第一 廷試第三授翰林院編
脩九年進侍講弘治充經筵講官官時內官李
廣怙寵干政鏊進講意存諷諫 上退謂左右
曰若等知今日講官之意乎蓋謂廣也 上出

游後苑鑿講無盤于游田辭嚴義暢 上悚聽
自是不復出游脩 憲廟實錄成進右春坊右
諭德陞侍講學士充經筵日講官 武廟出閣
進兼左春坊左諭德陞詹事府少詹事兼侍讀
學士陞吏部右侍郎李廣敗大臣多被污鑿獨
不與壽寧侯與鑿有連絕不與通歲時問遺輒
麾去或以爲過鑿曰昔萬循吉攀附昭德吾嘗
耻之乃今自附壽寧耶 孝皇末年將大用鑿
鑿以憂去 武皇登極起爲吏部侍郎內官馬

未成等八人蠱惑上心日事逸游給事中陶

諧劉蒞等論諫鰲言于戶部尚書韓文曰此國

家大事治亂所關大臣百僚之表獨無一言耶

六部會疏以請時吏部尚書焦芳黨附八人不

肯與名韓乃令戶部郎中李夢陽代草疏入

上大怒名諸大臣左順門宣旨切責衆相視莫

敢言鰲獨進曰八人者實蠱聖心不去之將

亂天下韓復抗言之上將遠竄未成等而八

人者環泣抱上足乞命上頗憐之事遂中

變劉瑾旣用事首擢焦芳入內閣以鑒時望也
乃命並典機務拜戶部尚書兼文淵閣大學士
尋加柱國少傅進兼太子太傅武英殿大學士
時瑾日益橫惡大學士謝遷尚書劉大夏韓文
必欲殺之鑒於衆中大言韓公精忠粹德天下
所知萬一死非其罪如萬世公議何由是得釋
劉大夏在廣西嘗易置土官岑氏瑾矯旨逮
下錦衣獄欲坐以激變鑒言今地方無虞岑氏
守職如故何名爲激變耶竟減死論時內閣

臣惟李東陽數稱病不出而焦芳者惟瑾是聽
鑒獨正色危言數以事忤瑾三疏乞歸瑾敗言
官數論薦不起今 皇帝入正大統賜璽書遣
行人存問鑒好學至老不倦於書無所不通而
尤邃于經文章簡嚴雅則多出于韓荊所著有
震澤集紀聞長語行于世

林待用

公俊名待用字見素其號莆人成化戊戌進士
爲主事署員外白沙薦至京日與講學時妖僧
繼曉挾近倖梁方以秘術進上爲建永昌寺

公䟽切論之下詔獄經歷張黻論救併下獄俱
謫遠方二人直聲振海內王端毅薦復南部弘
治初擢雲南按察副使俗崇釋公毀淫祠三百
有奇脩學築城民德之諸夷憚服辛亥擢按察
使湖廣風儀整肅吏不敢犯禁止私饋有忌之

者久弗調上時政引疾乞休歸已而起廣東右
布政使辭再起南京僉都御史巡江時江防頗
弛公悉心經理且持身清約與張簡肅齊名陝
西地震公上疏援古今徵應指斥時忌又疏乞
錄正人以端國本因薦謝方石儲靜夫楊方震
堪任輔導江西盜起遣公巡視比至榜示盜許
自新招獲巨魁餘孽解散改巡撫更定要約處
稅糧均徭役庶務一新值內艱武宗嗣位廷
薦擢右副都御史仍撫江西俄外艱改巡撫

川藍鄆之寇方劇公陳師鞠旅頒軍令數事將
致賊撫之忽報攻保寧卽取道救之遇賊於華
隴卑輿抵其巢宣朝廷德意示以禍福賊頓首
伏地公曰吾撫汝賊羅拜而謝旣而淫雨溪溢
賊失期疑阻遂謀拒州縣要害川兵脆不支公
取將領等命斬以徇諸軍股栗進戰皆捷賊衆
披靡前後擒斬俘獲無算已而曹甫并藍鄆餘
寇復熾公督兵追勦總制尚書洪襄惠公誘其
渠帥四十八人執之捷聞屢降勅獎諭晉右都

御史上官楊友與其兄爭襲已革其宣撫旣而
乃以萬金賂瑾求復公言宣撫不宜復亂階不
可啓忤瑾意瑾誅乃已公又奏請名用舊臣劉
健謝遷林瀚王鏊韓文以復舊政公不得新柄
臣意遂致仕辛巳公年七十 世宗繼統起爲
戶部尚書又改刑部尚書命侍經筵上親儒臣
勤講學疏內侍犯法者一無所貸癸未加宮保
再疏請歸命有司給廩存問公事二親盡誠孝
原宗族助婚喪雅志林壑一介弗苟取冲素如

寒士引接名流著有見素集

文懿

儲燿字靜夫其先毘陵人也宋時徙海陵今遂
爲泰州人生而秀穎少攻文辭成化癸卯舉應
天鄉試第一甲辰舉會試第一 廷試賜二甲
進士第一當是時泰州儲君名動京師美太宰
濟南尹旻欲選爲屬懇求便養授南京吏部考
功主事盧氏耿九疇知其爲人簡重端默有公
輔之器及轉天官尚書調燿考功郎中嘗覈一
官得實九疇忽又改評燿不從且云公所執何

異王介甫兩侍郎方並坐省中九疇大慙良久
曰我爲渠知已然非我莫能容也後尚書某繼
耿亦欲有所改評巵指其官注籍云嫌涉部長
鄉里遂不改弘治丙辰當黜涉天下官負巵考
如皋令某不稱職令囑某太監爲之請巵宣言
於署廳曰某某雜職尚能名節自檢有以進士
宰邑反不自立且託內侍干請亂法語人云方
發如皋令干託時吾幾媿死曾疏薦丁璣張吉
敖毓元王純李文祥五人可補諫職之缺六科

十三道官龐泮等論事下獄爲之申掾人服其

敢言丁巳陞太僕少卿乙丑陞本寺卿蒐訪馬

政得失剗革蠹弊脩舉所當興復者疏四事以

聞 詔皆報可又上章請紀注 孝廟言動以

示將來正德丁卯擢都察院左僉都御史總督

南京糧儲首釐正倉庾宿弊條上應議數事省

糧戶及京邑供給之費戊辰進戶部右侍郎已

巳轉左庚午春以疾乞休溫 詔答之賜乘傳

歸是冬召復舊職辭不就壬申春起爲南京戶

部左侍郎癸酉改南京吏部左侍郎甲戌卒於
官。雖有內行事親至孝撫從子洵如已出授之
經學竟以進士顯門人卒業者多取科第時李
夢陽何景明等倡古文辭執政者嫉才欲擯斥
之。雖以文章復古爲國家元氣故於李何極其
扶植得不傾陷性好學老而彌篤文法及森嚴
詩冲澹沈劇有陶韋之風所著有柴墟文集駟
野集奏疏各若干卷嘉靖癸未禮部以易名

賜諡曰文懿

羅文肅

公名玘字景鳴江西南城人博學好古屢試於鄉不第援例入國學閣老丘文莊爲祭酒因季試大賞異之舉京試第一舉進士改翰林庶吉士授編脩遇事激衷輒有陳列給事中龐泮主事李夢陽嘗因言事下詔獄皆力爲申救中官李廣死言者劾諸大臣嘗與交賄者當行斥逐玘疏以具瞻攸係宜諭令自陳或黜以他事庶不貽朝廷羞歷侍讀南京太常寺南京吏部

右侍郎連䟽請早建儲貳以繫人心絕窺覲三
載秩滿入京至良鄉以病請得致仕卒年七十
三贈禮部尚書諡文肅平生爲文尚竒崛遇有
作卽杜門謝客終日苦思數易稿不厭一時人
士皆望以爲不可及其風節刻厲如其爲文君
子謂易名爲稱情矣

王文莊

王清南

公名鴻儒字懋學南陽人成化丁未進士公聰
悟天成書過目成誦作字端勁知府段堅奇之
遣入郡學提學陳選異其文高等未幾發解河
南第一筮仕南京戶部出納倉庾權丹督稅皆
有條式弘治九年僉事提學山西十五年進副
使教人以涵養爲本文藝爲末正已率人泰
陵勵治思賢嘗召華容論人才曰藩臬中如王
鴻儒他日可大用正德改元致仕四年起祭酒

憂去七年起南京戶部侍郎十年入吏部歷左
右侍郎嘗曰惟誠與直能濟國事博名奚益也
時吏部尚書陸完有才名顧與宸濠交通公亟
稱夏忠靖王忠肅賢可師法既以感動完完不
說十四年三月陞公南戶部尚書是歲宸濠反
完敗公出督餉畱都至九江聞變謀起兵討賊
又聞康陵南巡益憤懣卒謚文莊公博聞多
識學有體要爲文宏裕尤明習國家故事凡
祖宗設政任人及先輩立朝行已歷歷能言

有按據至論時務要決成敗援證今古如探囊
指掌待物開誠和而有禮所著有王文莊等集
弟鴻漸字清南弘治甲子鄉試第一嘉靖癸未
進士官山東布政使著有席上寢語等集

偶吏目桓

殷教授奎

偶桓字武孟太倉人爲荊門州吏目

殷奎太倉人爲府教授

鳳洲筆記云二子並起名家共遵唐軌竝爾樹
立卓然不群吏目頗諧風格故多鴻爽之辭教
授才情兼至尤工感愴之調誠吾邦之盛軌張
陸之前驅也二公皆據鳳洲先生所評如此乃
其集未之覩士生一隅其聞見安能遍及寰區
乎滄海遺珠自昔歎之矣他日倘得遺編更當

掇其警句於簡末

湯公讓

湯胤勣字公讓濠梁人其曾祖佐高祖取天下是爲東甌襄武王胤勣少負才好使氣貌類河朔人兩眸睜然髭奮起如戟年十五六入學爲生徒日記數萬言學有舊版字千餘字胤勣騎馬過一目成誦應天尹下學傳籌名諸生胤勣獨後至當筭大呼折尹聲撼庭木尹愧憤卒笞之胤勣攘袂走出學門題詩府署合扉上有從今袖却經綸手且向江頭理釣絲之句遂去

學出游江湖上凡吳越間豪家富室爭延致之
周文襄公轉運江南聞其名召之至曰王孫能
作啓事否胤勣請紙筆卽席具狀幾萬言類宿
構者又切當世務文襄竒之上書薦其才有文
武具驛召赴京時于少保方督諸軍請試之立
胤勣將臺下萬卒環視于公摘古今將略及諸
史中事舉以問胤勣應對如洪鐘不能屈左右
嘖嘖歎賞于公亦撫掌曰吾子誠有才入對以
爲錦衣百戶從此起躋不常其最後以裨帥出

守孤山堡力戰死之爲人軒豁倜儻直欲起古
豪傑與之友視世之瑣瑣者以爲齷齪不足與
語好以氣雄人不問名位卑顯有不可意奮然
去不顧或遂罵之至其人面赤不少貸詩豪邁
奇崛如風雨晦冥中電光翕歟使人不敢正視
又如雷斧斷崖石下墜不測之淵觀者褫魄每
就人席上操觚立成數十章有名能詩者多爲
其所懾或不能措一語以遁平生著述有五雲
清唱風雅遺音東谷集十餘卷

倪文僖

倪文毅

公名謙字克讓別號靜存其先浙之錢塘人洪武初徙實京師占籍應天之上元生有異質雙目炯然如電眸有四乳性極穎敏書一經目即記不忘補應天府庠生文名大著時初設提學憲臣監察御史彭公鼎名知人廵力所至輒舉以勵諸生故就試京師者爭求識其面領正統戊午鄉薦賜已未進士及第第一甲三人拜翰林院編修入讀中秘書已巳奉使朝鮮遠人一

睹風采悚然嘆服時有所作即席揮洒略不經
意莫不驚以爲神景泰間入直文華殿每承顧
問有裨時政應制賦詩中官立候以進天順初
累遷至學士簡侍 憲廟于春宮日進講讀歟
所啓沃已卯主考順天鄉試斥黜權臣之子遂
誣搆以罪論戍開平在謫四年悠然以詩酒自
娛邊人愛慕如奉所親士子及門授經者歟所
造就至今科第不乏實有功焉 憲廟踐祚詔
復舊職尋進禮部右侍郎轉南京禮部進本部

尚書以疾乞致仕卒贈太子少保謚文僖公平
生德量寬洪與物無競恒喜獎拔後進不遺故
舊勤敏仕學至老不倦所著有玉堂稿一百卷
上谷稿八卷歸田稿四十二卷南宮稿二十卷
遼海編四卷藏于家

子名岳由進士入翰林與其父同日奉命進
史局纂修英廟實錄時以爲榮官亦至尚書
謚文毅

童士昂

公名軒字士昂其先饒州鄱陽儒族父碧瑄永樂初以天官學被召入欽天監家于秦淮幼穎敏讀書過目成誦充應天府學生領正統鄉薦登景泰辛未進士拜南京吏科給事中上疏言省冗員公考察倡武勇擇師儒杜倖進恤京民言多見採納時有詔南京採辦翠毛魚鮓等物以萬計又極論止之英廟復辟覽奏嘉其敢言尋上言弭盜安民數事尤切時弊天順戊寅

冬劾奏戶部尚書張鳳下獄詔宥之癸未同考
禮部會試精于校閱時稱得人甲申 憲廟踐
祚首上言帝王之治貴先本而後末隆聖德用
賢才納忠諫愛小民謹邊脩之謂本而簿書刑
名其末也且各詳本末施行之實反覆剴切
上優詔荅曰朕覽童軒所言都有理脩德用人
納諫朕當自勉餘令諸司舉行未幾四川盜作
廷議招撫之策推軒奉勅以往既奏功還明年
鎮巡官奏賊猖獗坐謫壽昌知縣尋用大宗伯

姚公薦陞雲南僉事提督雲貴學校甲午秋召
拜太常少卿掌欽天監宿弊一清癸卯春以疾
乞休歸金陵蕭然一室不異布衣時非知舊不
輕接納弘治戊申用廷議起仍掌天文事夏六
月日有食之因奏日食紀元之初當盛夏火旺
之候宜脩德以爲取人之本竊理以爲燭奸之
要進君子退小人以謹天戒是歲冬以僉舉進
都察院右副都御史奉勅提督松潘軍務兼理
巡撫辛亥春召爲南京吏部右侍郎甲寅進南

京禮部尚書三年二疏乞致仕皆不許有操履
清慎方切委任之諭感上知遇前後力陳數
十言皆電國要務丁巳三載考滿以疾弗任朝
請謁懇乞休致不許至冬復請詞益加切許之
生平讀書爲文淵博雄麗詩有唐人體裁足以
名家書法遒勁性篤孝友既入仕二親已歿事
嫡母夫人克盡子職分祿以養元嫂及故舊貧
乏者未嘗有缺然于物一介不苟取其自奉蔬
食飲水泊如也君子謂其廉勤慎密不愧古之

矣所著有清風亭稿枕松集海岳涓埃諭蜀稿
籌邊錄夢徵錄醢甕集若干卷

邵文莊

公名寶字國賢無錫人成化二十年進士初知
許州愛民訓士弘治七年入戶部爲員外郎郎
中凡歲秒會計出納及勾校京邊儲蓄鹽屯皆
公區條具疏陞按察副使提學江西章勵名節
敷寬善誘累官臬藩長吏政總大端而已正德
四年陞副都御史總漕巡撫江北公有清譽在
江淮不事改革赫赫漕大小將校皆嚴憚不敢
苛黷未幾事忤逆瑾瑾又惡平江伯平江伯者

潛帥也事連公瑾益怒禍且不測長沙力解得
致仕瑾誅起巡撫貴州陞戶部侍郎公故熟知
戶部程法見財用竭耗心憂之七年請養母歸
十四年陞南京禮部尚書辭嘉靖初再辭

詔特與終養母服闋請致仕不允卒贈太子少
保謚文莊公質性淳懿問學該洽孝親收族獎
誨後進應務之才細巨皆適所著學史簡端錄
二書巡撫吳廷舉上于朝又有容春堂集若干
卷

王應韶

公名雲鳳字應韶居山西和順之肅谷因號焉
父南京戶部尚書雲鳳成化癸卯鄉舉明年舉
進士除禮部主客司主事即清忠劾官獨立不
懼足不躡公卿門不赴無名飲宴或謗其矯激
不顧也成化弗豫禮部沿舊典舉齋醮雲鳳言
子禮部尚書周洪範曰祈禱固臣子至情第行
子佛老宮非禮若爲壇于南郊隙地大臣率屬
禱于天三日可也乃不克用弘治庚戌疏却貢

獅子疏入得允天下傳爲盛事陞祠祭司員外郎尚書倪岳因災異倡府部院疏弊政用雲鳳四事草一懲邪慝二禁給度三停減齋醮四議處宗室言甚剴切陞郎中 朝廷欲度僧乃疏列千餘言三上皆不報僧道通中貴者謀欲普度撼以危語不動 命下度僧不多而逃軍囚匠不與時人皆喜其有回天之力神樂觀道士多賭博或姦盜教坊司或買良爲娼錦衣衛校尉獲賊又誣娼巧取其資漸以成風雲鳳皆疏

題禁絕之又奏准天下郡縣皆立名宦鄉賢廟
祠爲後人式竝祠薛文清於鄉而凡斥韓王徵
鑒之道號禁吉府土木之科擾上皆嘉納由
此識名丁巳京城風霾踰旬各處天鳴地震雲
鳳陳修德弭災之道大意納忠言罷左道齋醮
傳辦傳奉諸事上遂下詔求直言雲鳳又
代部尚書及諸大臣條二十一事李廣表裏通
惡人莫敢言雲鳳又獨上疏乞斬廣泄神人憤
以弭災變廣怒令道士設醮咒死術以舒恨乃

令校尉數伺其出入十月朔 聖駕郊天看牲

回誣以駕後騎馬下錦衣獄謫知河南陝州比

至問民疾苦興利祛害惟恐後州城高阜井深

二百尺民難於水乃勸富僧通長子廣濟渠水

入城民皆踴躍日受百狀皆與別白口訊手判

仍應他務人以爲有劉穆之之風已未冬朝覲

南京科道官疏言雲鳳及布政周瑛等經術氣

節才行政績欲照天順四年例賜衣服楮幣宴

於禮部不果行李廣漸疎于 上懼誅飲毒死

吏部員外郎張綵及鴻臚寺丞俞琳編脩劉瑞
御史張天衢皆上疏乞窮李廣賣官鬻爵之罪
獎先生犯顏敢諫以慰人心乃陞陝西按察司
僉事陞副使整飭洮河岷州邊備乃申孝弟革
宿弊所按部贓污官吏有望風而遁者軍法嚴
明邊卒悅畏條疏八事皆可常行復改提學正
德丁卯陞山東按察司使丁母憂歸服闋陞國
子監祭酒始被命欲堅辭父大司徒公曰吾
老矣汝置我何處死乎不得已泣而就道素見

憎劉瑾至是復無所餽瑾怒欲中以禍竟不能得時國學教廢朝夕講說約束太嚴誹謗四出雲鳳欲更六堂名曰主敬窮理修身修道教諸生讀小書以上達瑾聞怒曰王雲鳳亂成法欲代邪讓死邪雲鳳以道不行快快求去會瑾下獄遂上疏乞致仕時相有忌之者乃改南京右通政復上疏乞養病御史楊邦積等交薦其賢又閑於韜略上命巡撫宣府地方又上疏以疾辭不允乃上楊太宰書其略云山中屢聞忠

讜之言近者畱王昂一疏尤爲人所傳頌不聞
唐介初貶時潞公有此也執事於是加人一等
矣然介雖貶未幾而復其殿中侍御史今王昂
旣不獲還之青瑣則推薦超陞在執事筆端焉
耳他日秉史筆者書此一行豈不足以照耀千
古哉每恨李文達近稱賢相然惡羅倫淪落以
死擯斥岳正坎珂終身極貧之陸布政反不得
超擢今文達之富貴安在哉一時快意可略也
前輩影樣之多後人是非之公可畏也一人私

言
情可略也天下指視之嚴史氏紀載之實可畏
也一身極榮極富極貴可略也每日光陰之易
去過者不可復補百年歲月之無多來者未必
可追可畏也且用舍之間士風所繫扶持正人
則善類慶而士風以振進獎邪人則善類沮而
士風以頹唯鳳與執事可以此言進故不復忌
諱況今兩耳皆聾調治不瘥只當耕田納稅爲
畎畝之閑民養親讀書忘歲月之不貸豈有夢
寐更著冠束帶耶伏望周旋其間以必得適歲

爲幸縱猿鹿於林莽之外投魚蝦於澔潏之中
某未死之年皆執事之賜也槁傳京師人爭錄
誦雲鳳再欲辭避尚書迫之行不獲已之鎮以
便宜從事將官犯法依律重輕罰米至萬餘石
用足軍食自叅將以下顧指氣使莫或敢喘息
練習軍士率有紀律日戒諭防衛如賊在目前
虜不敢輕入北門鎖鑰時論歸之兩閱月丁父
喪服闋除職如故清理浙江鹽法上疏乞致仕
略曰自聞父喪號泣過多正犯前病日每自思

恐一旦身先朝露上不能承父祖之餘業下不能爲子孫之後計愈思愈憂愈憂愈病精神減耗遂至兩耳皆聾不聞人聲然耳聾之疾深藏于內砭針之所不及參朮之所不攻雖遇明醫束手無策蓋以疾喻朝政也疏入不允復上疏推讓賢能懇乞致仕上不允准病痊起用雲鳳曰吾志遂矣遂歸不復出人日想見其丰采焉

石文隱

公名瑤字邦彥藁城人成化二十三年進士庶
吉士授檢討正德元年爲南院侍讀學士四年
南國子祭酒公靖方介恪潔已好修士類信響
五年召國子祭酒時浮逐兢進公獨鯁狷有名
八年爲南吏部侍郎十年召入禮部十六年進
尚書掌詹事府嘉靖初代王瓊吏部尚書吏部
黷亂者數年公以孤貞行一意柄臣不悅閱兩
月解吏部以尚書兼學士仍掌詹事府事嘉靖

三年五月 大禮議起諸大臣相繼去兼 文
淵閣大學士入 內閣五年六月加少保兼太
子太保大學士 武英殿尚書如故時時 召
對平臺煖閣議廟樂再議廟衢又議 章聖太
后 皇后謁 世廟儀守正義力爭 上謂公
非通儒公又三封內批言 太后 皇后出入

正朝陰強陽弱之兆忤旨六年二月致仕卒謚

文隱公清修無玷毀譽不撓持論堅確不避夷

險秉正嫉邪進禮退義所著有熊峰先生文集
簡帙寥寥風調雨自足名世

謝文卿

公名璿字文卿一字子象夢神授其名曰承舉
遂行焉先世贛人國初徙金陵璿八歲善詩
客命賦暝秋援筆立就至紫塞風寒鴈叫霜客
驚嘆呼爲奇童稍長從工部郎中吳元玉學見
其詩曰深林下馬蒼苔滑野寺入門秋爽多擊
節鑒賞謂雖長宿不易逮吏部侍郎儲靜夫爲
南考功作檀園詩社引諸文士聯句往往出奇
絕衆璿每應舉率用古文字作經義累十舉不

第乃擲筆於地曰吾本不樂爲此奈何效老驥
踟躕車下耶退畊國門之南自號野全子鄉人
稱野全先生又以其美鬚髯行九稱曰髯九翁
所著有采毫錄東村稿西遊錄在客稿日得錄
廣陵襍錄湘中漫錄總若干卷子少南舉進士
官至按察副使亦有才名

夏德樹

公名鏐字德樹天台人幼篤學博極墳典成化
丁未進士不樂仕進乞放歸弘治辛亥始起赴
闕奸人李孜省等亂政鏐上疏乞就近府教
吏部尚書王恕惜其才不與先是庶吉士鄒智
應星變詔進士李文祥上新政疏御史湯鼐劾
大學士萬安劉吉尹直給事中方向劾太監蔣
崧激昂標榜推李爲大將湯爲先鋒直聲振天
下文祥方從咸寧丞入兵部至是獄辭連及智

等謫戍殆盡于是鍬抗疏救之曰李文祥鄒智等皆以言得罪夫言官無流竄之禍則不足以彰其譽有謫徙之苦則愈足以見其難罪愈重而名愈高人主知此故轉而容之則言者無禍亦無名罪愈輕名愈鮮而福固歸于人主矣因并論大臣聯衡蔽塞言路吉等大怒矯詔下錦衣獄鞠治無所得禁錮月餘釋之復謝病歸家居十年再以強起值火篩入寇京師戒嚴人人爭獻靖虜計鍬獨以爲虜患雖可憂而土崩尾

解肅牆之禍尤有甚者疏陳自台及杭由江渡
淮以至輦下數千里間百姓之流竄賦役之煩
苦勢豪之橫害與夫官司之不恤民瘼歷叙其
饑寒死亡之狀以達 聖聽且欲以宋太祖燈

燕鰥華之失爲戒以真仁官掖儉約之德爲師
乞移見在之冗費以助軍需勿取已困之民財
而克妄用語語極懇切章入不省除南京大理寺
評事守備內豎違例受詞復奏奪其權尋以母
老乞終養不起嘉靖初 詔與遺逸竟以老辭

言林ノ外ノ一
年八十有三卒父墳景泰辛未進士仕至都察
院右副都御史巡撫四川時鏞方弱冠即爲詩
以盈滿諷之墳欣然解組歸五年而歿矣公雅
不欲乞恩典計聞 命下而襄事已畢官給白
金七百僅取以供祭祀餘悉散之貧族囊無畱
貲及公之喪八閔歲而不克葬侍郎新昌吳公
乃爲舉其殯云

喬希大

喬公名宇字希大山西太原人歷官中外至南京兵部尚書強幹謀猷時倚重臣生平喜爲詩詩雄槩有氣骨爲海內知名之士所欽企善大書及篆法是時南都徐霖亦工篆法嘗語人有明以來字篆法第一它人莫得望也其許與如此宇有關西紀行詩一編顧璘爲叙曰弘治丙辰間朝廷上下無事文治蔚興若今大宗伯喬公宇少司徒邵公寶前少宰儲巵中丞王公

雲鳳皆翱翔郎署爲士林之領袖砥礪乎節義
刮磨乎文章學者師從焉逮今上御極以來
羣盜竝起嚮用武力學者耻言文事加以逆瑾
中害善類好修之士凜凜以言爲諱然浮靡之
習旣昌而忌疾詆害之意起人務自異不相輸
衷矣抑其勢然耶關西紀行一編乃喬公祭告
華岳日所與王中丞倡和諸詩也大篇短章如
響斯荅正者準雅則奇者挾幽險君臣師友之
益不覺其羨慕之久而繼之以歔歔也遂懷而
刻之湘南俾後來得覽觀焉匪徒以其文也